

Ucapan Y.A.B. Timbalan Perdana Menteri,  
Datuk Hussein Onn, dalam Upacara  
Pembukaan Resmi Sekolah Menengah  
Tun Ismail di Parit Raja, Batu Pahat  
pada hari Ahad 16hb Februari 1975  
Jam 10.00 pagi.

Tuan Pengerusi Majlis,  
Yang Berbahagia Guru Besar dan Guru-Guru  
Sekolah Menengah, Tun Ismail,  
Yang Berbahagia Pengerusi Lembaga Jumaah  
Pengelola Sekolah,  
Tuan-Tuan dan Puan-Puan sekalian.

Hari ini sesungguhnya merupakan hari yang bersejarah kepada sekolah ini, kepada guru-guru dan murid-murid, kerana sempena perayaan ulangtahun yang kesepuluh, upacara meresmikan bangunan sekolah ini telah dapat juga diadakan hari ini. Saya amat bangga dan bersyukur kepada Allah Subhanahu Wata'ala, kerana dapat bertemu-muka dengan penduduk-penduduk disini serta meresmikan upacara pembukaan ini.

2. Saya sukalah mengucapkan terimakasih kepada guru besar dan ahli-ahli jawatankuasa, yang telah memberikan penghormatan ini kepada saya. Saya bersetuju menerima jemputan meresmikan Sekolah ini, selepas diberitahu bahawa Yang Berbahagia Toh Puan Norashikin, bahu Allahyarham Tun Dr. Ismail tidak dapat menyempurnakan upacara ini. Oleh kerana saya adalah juga menjadi wakil rakyat kawasan ini, pada hemat saya, upacara ini memberi peluang yang baik kepada saya menemui penduduk-penduduk disini dan bertemu ramah dengan mereka, disamping dapat menyampaikan serba sedikit pesanan mengenai perkembangan negara dari segi ekonomi, sosial dan politik.

Nama Sekolah ini sangatlah sesuai kerana Tun Dr. Ismail merupakan salah seorang negarawan dan Pemimpin Negara kita yang dikasihi dan banyak berjasa. Demikian juga, tidak berapa jauh dari sini adalah tempat Datuknya membangunkan Kampong dan disitulah keluarganya mula berjejak sehingga ia mencapai satu peringkat keistimewaan dalam riwayat hidupnya.

Saudara-saudara sekalian,

3. Pada hari ini, kita dapat menyaksikan satu detik perkembangan dan kemajuan pelajaran di negara kita, yang belum pernah kita rasakan dimasa-masa yang lalu. Sekolah Tun Dr. Ismail ini merupakan salah sebuah dari beratus-ratus Sekolah Menengah yang didirikan semenjak negara merdeka, dibawah rancangan

Pembangunan kita. Sekolah ini juga adalah diantara beberapa kemudahan pelajaran yang dibawa keluar bandar untuk memberikan peluang yang seimbang dengan kemudahan bandar. Saudara-saudara tentu masih ingat, sebelum Tanah Melayu ini merdeka, bilangan Sekolah Menengah adalah terhad dan dihadkan kepada Sekolah Bahasa Penghantar Inggeris sahaja. Alhamdulillah, dibawah dasar Pelajaran Kebangsaan, kita telah dapat membina Sekolah Menengah aliran Melayu, sejajar dengan kehendak dan aspirasi sebahagian besar rakyat negara ini. Bukan itu sahaja, bahkan Universiti Kebangsaan yang mempunyai Bahasa Penghantar Bahasa Malaysia dan Institusi Pelajaran lain, telah juga didirikan dan sudahpun mula mengeluarkan siswazahnya. Tidak syak lagi, inilah bukti dari keazaman dan kecekapan

Kerajaan pada mentadbirkan negara dan pada memenuhi kehendak-kehendak yang kian memuncak, dari rakyat sekelian.

4. Saya amat berbangga dengan kemajuan Sekolah ini, seperti yang diterangkan tadi, yang mempunyai bilangan murid yang ramai dan telahpun mengeluarkan pelajar-pelajar yang berbakat, serta berpeluang mendapatkan pelajaran lebih tinggi. Saya penuh yakin dibawah tadbir Guru Besar dan kelolaan Lembaga Pengelola, Sekolah ini akan dapat mencapai kemajuan yang lebih pesat dimasa akan datang. Ibubapa, Guru-Guru dan murid-murid hendaklah memainkan peranan masing-masing dalam perkara ini.

5. Demikian juga, pada keseluruhannya, saya amat bangga dengan Daerah Batu Pahat ini, kerana bukan sahaja terdapat Sekolah Menengah yang dikelolakan oleh Kerajaan atau mendapat bantuan Kerajaan, tetapi juga Sekolah swasta yang didirikan oleh penduduk tempatan bagi membantu pelajar-pelajar tercicir ataupun yang tidak mendapat kelulusan yang baik, bagi melanjutkan pelajaran mereka. Ini jelaslah membuktikan bahawa kesedaran rakyat, khasnya ibu bapa di daerah ini, pada memberikan pelajaran kepada anak-anak mereka sangatlah tinggi. Ini juga membuktikan bagaimana tingginya nilai pelajaran diletakkan oleh ibu bapa diatas perkara yang lain. Saya harap dengan kesedaran ini, dapatlah disejajarkan dengan keinginan kita untuk mengeluarkan anak-anak yang penuh disiplin,

anak-anak yang mempunyai daya pemikiran kuat dan juga mempunyai tujuan hidup yang motivated, serta sanggup berbakti kepada negara dan masyarakat.

Saudara-saudara sekelian,

6. Kerajaan sedar bahawa dengan meninggikan taraf pelajaran dan melaksanakan perubahan, sudah tentu akan memperbanyakkan bilangan orang-orang terpelajar. Akan tibalah masanya negara kita ini mempunyai anak-anak yang semuanya mempunyai pelajaran dan tidak seorangpun buta huruf atau tidak mempunyai pendidikan asas. Tetapi masyarakat terpelajar sahaja, tanpa mempunyai rasa tanggungjawab, tanpa disiplin, tanpa tujuan hidup, tidaklah diingini. Kita mahu mencipta satu jenerasi masyarakat yang boleh mewarisi pimpinan negara dimasa depan,

tanpa merosakkan asas perpaduan rakyat berbilang bangsa, tanpa menjejaskan kesetabilan ekonomi, tanpa mencetuskan rasa permusuhan antara kaum dan dengan tidak mengubah sistem demokrasi berparlimen. Oleh itu, mulai dari sekarang juga, kita patut bertindak bahawa tanggungjawab ibu bapa, bukan sahaja setakat memberi pelajaran kepada anak-anak, tetapi juga arahan, penyeliaan dan kawalan supaya mereka berdisiplin dan mempunyai matlamat hidup, sesuai dengan kehendak dan keperluan negara kita.

7. Saya tahu, kebanyakan masyarakat dan ibu bapa hanya memikirkan tanggungjawab mereka semata-mata memberikan pelajaran kepada anak-anak. Sikap ini memanglah dihargai<sup>dan</sup> dipandang mulia. Bahkan saya tahu, ada diantara ibu bapa, sanggup menanggung penderitaan, sanggup membanting tulang, sanggup mengeluarkan perbelanjaan dan bersusah payah untuk menyara anak-anak itu bersekolah. Tetapi, dalam konteks sekarang, dimana kita melihat gejala-gejala anak-anak ini terpengaruh dengan dadah, terpengaruh dengan kumpulan jahat, terpengaruh dengan kumpulan memprotes dan membenci kerajaan, maka saya rasa, bebanan ibu bapa janganlah terhad kepada memberi pelajaran dan makan minum sahaja, tetapi juga menjaga anak-anak sebaik-baiknya.

Saudara-saudara sekalian,

8. Saya sedar ramai ibu bapa yang tidak mampu berbuat demikian, kerana sikap setengah anak-anak yang liar dan tidak dapat dikawal. Disinilah letaknya tanggungjawab masyarakat secara kolektif, pemimpin-pemimpin parti politik, kaum ibu, pemimpin masyarakat, orang-orang individu yang ada rasa tanggungjawab, supaya dapat memberi bimbingan, nasihat dan teguran. Dalam hal ini juga, kaum guru adalah mempunyai tanggungjawab yang sama beratnya dengan ibu bapa. Guru-Guru janganlah menhadkan kewajipan mereka setakat menyampaikan pelajaran kepada anak-anak, tanpa memberikan kesedaran dan mendisiplinkan mereka kearah jalan yang baik.

Kaum guru disifatkan menjadi acuan dalam perkembangan fikiran dan peradaban anak-anak disekolah. Setiap perbuatan dan tuturkata guru boleh menjadi tauladan dan sempadan. Kepada tujuan inilah, kepada hasrat mewujudkan masyarakat yang bersopan dan berhemah. inilah, guru dapat memberikan tunjuk ajar dan contoh yang sesuai.

9. Seperkara lagi, yang patut dipastikan oleh ibu bapa, mahupun pemimpin masyarakat, ialah supaya benar-benar memahami akan kehendak-kehendak anak-anak kita, dan memberi panduan serta penjelasan supaya mereka itu faham dan dapat dibimbing kearah yang benar. Baru-baru ini, seperti yang saudara-saudara sekelian maklum, telah timbul apa yang dikatakan angkatan pelajar insaf dan sebahgiannya menumpukan perhatian, bukan terhadap pelajaran, tetapi terhadap kelemahan kerajaan dan apa yang dikatakan penderitaan rakyat. Kita faham bagaimana tekasnya darah muda ini naik panas, sekiranya ia dibakar dengan semangat yang berapi-rapi. Kerajaan juga menyedari bagaimana perasaan ini boleh dinaikkan, semata-mata dengan

meniupkan sentimen membuat tuduhan-tuduhan melulu. Tetapi kita tidak faham mengapa sebahagian pelajar-pelajar tahu kritis tetapi tidak 'creative'; mengapa mereka mudah terpengaruh dengan hasutan dan fitnah, serta tidak memberi pertimbangan yang sewajarnya dalam beberapa perkara. Pelajar-Pelajar di Pusat Pengajian Tinggi, khasnya pelajar bumiputra, adalah diantara golongan terbesar yang mendapat bantuan Kerajaan. Belum pernah berlaku dalam sejarah negara yang Kerajaan serta beberapa institusi lain, memberikan perhatian berat, memberi bantuan yang begitu banyak kepada pelajar-pelajar kita. Pelajar-Pelajar di Universiti, kebanyakannya diberi bantuan biasiswa ataupun pinjaman wang. Mereka itu sangat bertuah. Dengan kerana itu, kita

boleh menyaksikan di Universiti-Universiti, masyarakat pelajar begitu mewah, pelajar mendapat kemudahan hidup yang setanding atau lebih baik, dari pelajar di negara lain. Bilangan pelajar di Malaysia yang mempunyai kemudahan seperti skooter, motokar, dan sebagainya adalah diantara yang tertinggi sekali.

Saudara-saudara sekalian,

10. Dari pengalaman kita dimasa lepas, ibu bapa, pemimpin masyarakat dan setiap warganegara, hendaklah membantu Kerajaan pada mencari punca dan mengatasi masalah yang dibangkitkan oleh pelajar ini, dengan harapan, supaya mereka dapat menumpukan pelajaran, menghapuskan perkara yang merugikan mereka sendiri, merugikan negara dan memperkecilkan taraf pelajar-pelajar di mata orang ramai.

Sungguhpun kegelisahan yang dicetuskan oleh pelajar-pelajar telah reda, tetapi ada tanda-tanda bahawa pelajar, dalam masa percutian universiti ini, akan mempergiatkan aktiviti mereka di kampung-kampung.

Rombongan mereka sudah mula pergi. Persiapan-persiapan mereka telahpun dikesan. Tujuan mereka ialah untuk menguatkan sokongan politik mereka di kampong-kampong, berasaskan apa yang disebut 'kelemahan' kerajaan.

Pelajar-pelajar telah gagal dan silap perhitungan pada menegakkan asas kekuatan mereka di bandar. Tugas kita, saudara-saudara sekelian, ialah untuk menapikan sama sekali asas dan kekuatan pelajar-pelajar itu di kampong-kampong atau dimana-mana juga.

Semua cawangan parti-parti dalam Barisan Nasional, khasnya UMNO, telah diberi arahan

supaya mengawasi dan menumpaskan sebarang ikhtiar pelajar menegakkan kekuatan mereka mempengaruhi rakyat. Kerajaan ingin memberi amaran bahawa sebarang usaha menghasut rakyat membenci kerajaan, akan ditentang dengan apa juga kekuatan yang ada pada kita.

Saudara-saudara sekalian,

11. Kerajaan telahpun membentuk satu Jawatankuasa Kabinet bagi mengkaji semula pelaksanaan Dasar Pelajaran, dalam konteks perkembangan baru. Jawatankuasa ini, kita percaya, akan dapat mengemukakan syor-syor yang boleh melicinkan sistem pelajaran kita, sesuai dengan kehendak rakyat dan kemampuan negara. Disamping itu, Kerajaan juga telah menubuhkan sebuah Jawatankuasa Kabinet mengenai pelajar yang saya sendiri Pengerusinya,

untuk menentukan langkah-langkah yang patut diambil pada mengatasi masalah pelajar, baik pada jangka pendek dan juga jangka panjang. Proses ini tentulah mengambil masa, tetapi saya yakin Kerajaan dengan sokongan semua pihak, akan dapat mengatasi masalah-masalah yang dihadapinya dengan bijaksana dan saksama.

12. Menganalisa aktiviti pelajar, kita tidak dapat terkecuali dari tekanan dan pengaruh beberapa pihak. Beberapa faktor timbul, bukan sahaja oleh pengaruh didalam negeri, bahkan terdapat juga elemen pemikiran luar. Ditengah-tengah dunia pelajar terdapat anasir anti nasional serta kominis, bergerak memperalatkan pelajar dengan meniup semangat membenci Kerajaan. Inilah perkara yang diselidiki dan membuktikan sifat anasir-anasir

yang melemparkan batu tetapi menyembunyikan tangan. ~~itu~~. Semuanya ini berlaku sebagai ujian Tuhan kepada kita. Dan secara kebetulan, semuanya ini berlaku ditengah-tengah saat Parti dan Kerajaan mendapat mandat yang besar dari rakyat untuk membawa pembangunan dan perubahan. Semuanya ini berlaku ditengah-tengah keinginan kita untuk berdikari disegi ekonomi dan politik, untuk bebas dari tekanan dan pengaruh kuasa-kuasa besar, diketika kita bangun untuk mengukir sejarah menjadikan Asia Tenggara ini satu zone aman, bebas dan berkecuali. Sekalipun demikian, dengan izin Tuhan, berkat perpaduan kita semua, Insya Allah kita akan dapat melalui segala ujian ini dan mencapai tujuan kita membawa kemakmuran dan kebahagiaan untuk rakyat.

Saudara-saudara sekalian,

13. Beralih kepada perkara lain yang hampir dengan kita, saya inginlah mengambil kesempatan ini membawa perhatian hadirin sekalian kepada Rancangan Buku Hijau. Sebenarnya, daerah ini adalah kawasan yang sudah sedia memperektykan Buku Hijau dengan mengeluarkan hasil tanaman yang banyak. Namun demikian, boleh jadi ada lagi peluang-peluang yang patut kita ambil untuk menjayakan rancangan ini supaya kita benar-benar dapat munafaat dari usaha kita dan kejayaan kita.

14. Sebelum menutup ucapan ini, saya sukalah menyentuh akan perkara mengadakan sebuah dewan di Sekolah ini seperti yang dibisikkan kepada saya. Perjumpaan kita hari ini, disebabkan oleh ramainya jemputan yang hadir terpaksa diadakan di padang oleh sebab ketiadaan Dewan yang besar. Saya penuh bersimpati dengan kehendak ini, memandangkan bahawa bilangan murid sekolah makin bertambah setiap tahun. Adalah menjadi dasar kerajaan, semenjak dari dulu lagi, tidak memberikan keutamaan yang tinggi terhadap perkara dewan ini sungguhpun kita sedar bahawa ia juga mustahak. Adalah lebih munafaat kalau peruntukan bagi Dewan itu, digunakan membina bilik darjah atau membeli peralatan yang lain.

Pada jangka panjangnya ini adalah lebih berfaedah. Sungguhpun demikian, saya percaya, perkara ini boleh dirundingkan dengan Kementerian Pelajaran.

Saudara-saudara sekalian,

15. Akhir kata saya inginlah mengucapkan terima kasih ~~bagi pihak Kerajaan~~ atas kerjasama tuan-tuan sekalian pada menjayakan perjumpaan ini. Saya berikrar untuk sentiasa berkhidmat kepada rakyat didaerah ini khasnya, dan seluruh negara amnya, sesuai dengan kemampuan dan tenaga saya.

16. Sebagai menghargai penat lelah dan kerjasama guru-guru, murid-murid dan ibu bapa ~~sekolah~~ pada menjayakan majlis ini, dan setelah berunding dengan Pengarah Pelajaran Negeri Johor, saya sukacitalah mengishtiharkan hari esok, ~~Isnin~~, 17hb Februari, sebagai hari kelepasan am sekolah.

17. Dengan harapan dan ingatan yang saya berikan tadi, saya dengan sukacitanya meresmikan Bangunan Sekolah Tun Ismail ini dan, selamat merayakan Ulangtahun yang ke Sepuluh.

Terima kasih.



No. Siri ..... 141  
No Penerimaan ..... 3/79